

四庫全書

史部

欽定四庫全書

史部

通鑑紀事本末卷十二下

詳校官編修

臣程槐

編修

臣裴謙覆勘

總校官檢討

臣何思鈞

校對官中書

臣楊世綸

謄錄監生

臣席慶年

欽定四庫全書

通鑑紀事本末卷十二

宋 袁樞 撰

西晉之亂

永興元年春正月長沙厲王又屢與大將軍穎戰破之前後斬獲六七萬人而又未嘗虧奉上之禮城中糧食日窘而士卒無離心張方以為洛陽未可克欲還長安而東海王越慮事不濟癸亥潛與殿中諸將夜收又送

別省甲子越啓帝下詔免又官置金墉城大赦改元城  
既開殿中將士見外兵不盛悔之更謀劫出又以拒穎  
越懼欲殺又以絕衆心黃門侍郎潘滔曰不可將自有  
靜之者乃遣人密告張方丙寅方取又於金墉城至營  
矣而殺之方軍士亦為之流涕公卿皆詣鄴謝罪大將  
軍穎入京師復還鎮于鄴詔以穎為丞相加東海王越  
守尚書令穎遣奮武將軍石超等帥兵五萬屯十二城  
門殿中宿所忌者穎皆殺之悉代去宿衛兵表盧志為

中書監留鄴參署丞相府事 河間王顥煩軍於鄴為

東軍聲援聞劉沈兵起還鎮渭城遣督護虞夔逆戰於  
好畤夔兵敗顥懼退入長安急召張方方掠洛中官私  
奴婢萬餘人而西軍中乏食殺人雜牛馬肉食之劉沈  
渡渭而軍與顥戰顥屢敗沈使安定太守衛博功曹皇  
甫澹以精甲五千襲長安入其門力戰至顥帳下沈兵  
來遲馮翊太守張輔見其無繼引兵橫擊之殺博及澹  
沈兵遂敗收餘卒而退張方遣其將敦偉夜擊之沈軍

驚潰沈與麾下南走追獲之沈謂顥曰知己之惠輕君臣之義重沈不可以違天子之詔量彊弱以苟全投袂之日期之必死菹醢之戮其甘如薺顥怒鞭之而後甞斬新平太守江夏張光數為沈畫計顥執而詰之光曰劉雍州不用鄙計故令大王得有今日顥壯之引與歡宴表為右衛司馬三月乙酉丞相穎表廢皇后羊氏幽于金墉城廢皇太子覃為清河王河間王顥表請立丞相穎為太弟戊申詔以穎為皇太弟都督

中外諸軍事丞相如故大赦乘輿服御皆遷于鄴制度一如  
魏武帝故事以顯為太宰大都督雍州牧前太傅劉寔為  
太尉寔以老固辭不拜皇太弟穎僭侈日甚嬖倖用事  
大失衆望司空東海王越與右衛將軍陳旌及長沙王  
故將上官已等謀討之秋七月丙申朔陳旌勒兵入雲  
龍門以詔召三公百僚入殿中戒嚴討穎石超并鄴戊  
戌大赦復皇后羊氏及太子覃已亥越奉帝北征以越  
為大都督徵前侍中嵇紹詣行在侍中秦準謂紹曰今

往安危難測卿有佳馬乎紹正色曰臣子扈衛乘輿死  
生以之佳馬何為越檄召四方兵赴者雲集比至安陽  
衆十餘萬鄴中震恐潁會羣僚問計東安王繇曰天子  
親征宜釋甲縞素出迎請罪潁不從遣石超帥衆五萬  
拒戰折衝將軍喬智明勸潁奉迎乘輿潁怒曰卿名曉  
事投身事孤今主上為羣小所逼卿奈何欲使孤束手  
就刑邪陳瞻二弟匡規自鄴赴行在云鄴中皆已離散  
由是不甚設備己未石超軍奄至乘輿敗績於蕩陰帝

傷頰中三矢百官侍御皆散嵇紹朝服下馬登輦以身  
衛帝兵人引紹於轅中斫之帝曰忠臣也勿殺對曰奉  
太弟令惟不犯陛下一人耳遂殺紹血濺帝衣帝墮於  
草中亡六璽石超奉帝幸其營帝餒甚超進水左右奉  
秋桃穎遣盧志迎帝庚申入鄴大赦改元曰建武左右  
欲浣帝衣帝曰嵇侍中血勿浣也陳軫上官已等奉太  
子羣守洛陽司空越犇下邳徐州都督東平王楙不納  
越徑還東海太弟穎以越兄弟宗室之望下令招之越

不應命前奮威將軍孫惠上書勸越要結藩方同獎王室越以惠為記室參軍與參謀議北軍中侯苟晞奔范陽王虓虓承制以晞行兗州刺史初三王之起兵討趙王倫也安北將軍王浚擁衆挾兩端禁所部士民不得赴三王召募太弟穎欲討之而未能浚心亦欲圖穎穎以右司馬和演為幽州刺史密使殺浚演與烏桓單于審登謀與浚游薊城南清泉因而圖之會天暴雨兵罷霑濕不果而還審登以為浚得天助乃以演謀告浚

浚與審登密嚴兵約并州刺史東嬴公騰共圍演殺之  
自領幽州營兵騰越之弟也太弟穎稱詔徵浚浚與鮮  
卑段務勿塵烏桓羯朱及東嬴公騰同起兵討穎穎遣  
北中郎將王斌及石超擊之太弟穎怨東安王繇前  
議八月戊辰收繇殺之初繇兄瑯邪恭王覲薨子睿嗣  
睿沉敏有度量為左將軍與東海參軍王導善導敦之  
從父弟也識量清遠以朝廷多故每勸睿之國及繇死  
睿從帝在鄴恐及禍將逃歸穎先敕諸闕津無得出貴

人睿至河陽為津吏所止從者宋典自後來以鞭拂睿而笑曰舍長官禁貴人汝亦被拘邪吏乃聽過至洛陽迎太妃夏侯氏俱歸國丞相從事中郎王澄發孟玖姦利事勸太弟穎誅之穎從之司空越之討太弟穎也太宰顓遣右將軍馮翊太守張方將兵二萬救之聞帝已入鄴因命方鎮洛陽上官已與別將苗願拒之大敗而還太子覃夜襲已願已願出走方入洛陽覃於廣陽門迎方而拜方下車扶止之復廢覃及羊后初太弟

穎表匈奴左賢王劉淵為冠軍將軍使將兵在鄴以淵

子聰為積弩將軍淵從祖右賢王宣等謀共立淵為大單于

事見劉淵僭漢

王浚東嬴公騰起兵淵說穎曰今二鎮跋扈衆十

餘萬恐非宿衛及近郡士衆所能禦也請為殿下還說

五部以赴國難穎曰五部之衆果可發否就能發之鮮

卑烏桓未易當也吾欲奉乘輿還洛陽以避其鋒徐傳

檄天下以逆順制之君意何如淵曰殿下武皇帝之子

有大勲於王室威恩遠著四海之內孰不顧為殿下盡

死力者何難發之有王浚豎子東嬴踈屬豈能與殿下  
爭衡邪殿下發鄴宮示弱於人洛陽不可得至雖至  
洛陽威權不復在殿下也願殿下撫勉士衆靖以鎮之  
淵請為陛下以二部推東嬴三部梟王浚二豎之首可  
指日而懸也穎悅拜淵為北單于參丞相軍事淵至左  
國城劉宣等上大單于之號二旬之間有衆五萬都於  
離石以聰為鹿蟲王遣左於陸王宏帥精騎五千會穎  
將王粹拒東嬴公騰粹已為騰所敗宏無及而歸王浚

東嬴公騰合兵擊王斌大破之浚以主簿祁弘為前鋒  
敗石超於平棘乘勝進軍候騎至鄴鄴中大震百僚奔  
走士卒分散盧志勸穎奉帝還洛陽時甲士尚有萬五  
千人志夜部分至曉將發而程太妃戀鄴不欲去穎狐  
疑未決俄而衆潰穎遂將帳下數十騎與志奉帝御犢  
車南奔洛陽倉猝上下無齎中黃門被囊中齎私錢三  
千詔貸之於道中買飯夜則御中黃門布被食以瓦盆  
至溫將謁陵帝喪履納從者之履下拜流涕及濟河張

方自洛陽遣其子羆帥騎三千以所乘車奉迎帝至芒  
山下方自帥萬餘騎迎帝方將拜謁帝下車自止之帝  
還宮犇散者稍還百官粗備辛巳大赦王浚入鄴士衆  
暴掠死者甚衆使烏桓羯朱追太弟穎至朝歌不及浚  
還薊以鮮卑多掠人婦女命有敢挾藏者斬於是沈於  
易水者八千人 劉淵聞太弟穎去鄴歎曰不用吾言  
逆自犇潰真奴才也然吾與之有言矣不可以不救將  
發兵擊鮮卑烏桓劉宣等諫曰晉人奴隸御我今其骨

肉相殘是天棄彼而使我復呼韓邪之業也鮮卑烏桓  
我之氣類可以為援奈何擊之淵曰善大丈夫當為漢  
高魏武呼韓邪何足効哉宣等稽首曰非所及也

冬十月帝既還洛陽張方擁兵專制朝政太弟穎不得  
復預事豫州都督范陽王虓徐州都督東平王楙等上  
言穎弗克負荷宜降封一邑特全其命太宰宜委以關  
右之任自州郡以下選舉授任一皆仰成朝之大事廢  
興損益每輒疇咨張方為國効節而不達變通未即西

還宜遣還郡所加方官請悉如舊司徒戎司空越並忠國小心宜幹機事委以朝政王浚有定社稷之勲宜特崇重遂撫幽朔長為北藩臣等竭力捍城藩屏皇家則陛下垂拱四海自正矣張方在洛既久兵士剽掠殆竭衆情喧喧無復留意議欲奉帝遷都長安恐帝及公卿不從欲須帝出而劫之乃請帝謁廟帝不許十一月乙未方引兵入殿以所乘車迎帝帝馳避後園竹中軍人引帝出逼使上車帝垂泣從之方於馬上稽首曰今寇

賊縱橫宿衛單少願陛下幸臣壘臣盡死力以備不虞  
時羣臣皆逃匿唯中書監盧志侍側曰陛下今日之事  
當一從右將軍帝遂幸方壘令方具車載宮人寶物軍  
人因妻略後宮分爭府藏割流蘇武帳為馬幟魏晉以  
來蓄積掃地無遺方將焚宗廟宮室以絕人返顧之心  
盧志曰昔董卓無道焚燒洛陽怨毒之聲百年猶存何  
為襲之乃止帝停方壘三日方擁帝及太弟穎豫章王  
熾等趨長安王戎出犇却太宰顓帥官屬步騎三萬迎

于霸上顯前拜謁帝下車止之帝入長安以征西府為  
宮唯尚書僕射荀藩司隸劉暉河南尹周馥等在洛陽  
為留臺承制行事號東西臺藩勛之子也丙午留臺大  
赦改元復為永安辛丑復皇后羊氏 十二月丁亥  
詔太弟頴以成都王還第更立豫章王熾為皇太弟帝  
兄弟二十五人時存者惟頴熾及吳王晏晏材質庸下  
熾冲素好學故太宰顯立之詔以司空越為太傅與顯  
夾輔帝室王戎參錄朝政又以光祿大夫王衍為尚書

左僕射高密王略為鎮南將軍領司隸校尉權鎮洛陽  
東中郎將模為寧北將軍都督冀州諸軍事鎮鄴百官  
各還本職令州郡蠲除苛政愛民務本清通之後當還  
東京大赦改元略模皆越之弟也王浚既去鄴越使模  
鎮之顓以四方乖離禍難不已故下此詔和解之冀獲  
少安越辭太傅不受又詔以太宰顓都督中外諸軍事  
張方為中領軍錄尚書事領京兆太守

二年夏四月張方廢羊后 游楷等攻皇甫重累年不能克

重遣其養子昌求救於外昌詣司空越越以太宰顥新與山東連和不肯出兵昌乃與故殿中人楊篇詐稱越命迎羊后於金墉城入宮以后令發兵討張方奉迎大駕事起倉猝百官初皆從之俄知其詐相與誅昌顥請遣御史宣詔喻重令降重不奉詔先是城中不知長沙厲王及皇甫商已死重獲御史騶人問曰我弟將兵來欲至未騶人曰已為河間王所害重失色立殺騶人於是城中知無外救共殺重以降顥以馮翊太守張輔為秦州刺史

東海中尉劉洽以張方劫遷車駕勸司空越起兵討之秋七月越傳檄山東征鎮州郡云欲糾帥義旅奉迎天子還復舊都東平王楙聞之懼長史王脩說楙曰東海宗室重望今興義兵公宜舉徐州以授之則免於難且有克讓之美矣楙從之越乃以司空領徐州都督楙自為兗州刺史詔即遣使者劉虔授之是時越兄弟並據方任於是范陽王虓及王浚等共推越為盟主越輒選置刺史以下朝士多赴之成都王穎既廢河北人

多憐之穎故將公師藩等自稱將軍起兵於趙魏衆至數萬初上黨武鄉羯人石勒有膽力善騎射并州大饑建威將軍閻粹說東嬴公騰執諸胡於山東賣充軍實勒亦被掠賣為荏平人師懼奴懼竒其狀貌而免之懼家鄰於馬牧勒乃與牧帥汲桑結壯士為羣盜及公師藩起桑與勒帥數百騎赴之桑始命勒以石為姓勒為名藩攻陷郡縣殺二千石長史轉前攻鄴平昌公模甚懼范陽王虓遣其將苟晞救鄴與廣平太守譙國丁紹

共擊藩走之 秋八月司空越以瑯琊王睿為平東將  
軍監徐州諸軍事留守下邳睿請王導為司馬委以軍  
事越帥甲卒三萬西屯蕭縣范陽王虓自許屯于滎陽  
越承制以豫州刺史劉喬為冀州刺史以范陽王虓領  
豫州刺史喬以虓非天子命發兵拒之虓以劉琨為司  
馬越以劉藩為淮北護軍劉輿為潁川太守喬上尚書  
列輿兄弟罪惡因引兵攻許遣其長子祐將兵拒越於  
蕭縣之靈壁越兵不能進東平王楙在兗州徵求不已

郡縣不堪命范陽王虓遣苟晞還兗州徙楸都督青州  
楸不受命背山東諸侯與劉喬合 太宰顓聞山東兵  
起甚懼以公師藩為成都王穎起兵壬午表穎為鎮軍  
大將軍都督河北諸軍事給兵千人以盧志為魏郡太  
守隨穎鎮鄴欲以撫安之又遣建武將軍呂朗屯洛陽  
顓發詔令東海王越等各就國越等不從會得劉喬上  
事冬十月丙子下詔稱劉輿迫脅范陽王虓造構凶逆  
其令鎮南大將軍劉弘平南將軍彭城王釋征東大將軍

劉準各勒所統與劉喬并力以張方為大都督統精卒  
十萬與呂朗共會許昌誅興兄弟釋宣帝弟子穆王權  
之孫也丁丑顓使成都王頽領將軍樓寢等前車騎將  
軍石超領北中郎將王闡等據河橋為劉喬繼援進喬  
鎮東將軍假節劉弘遺喬及司空越書欲使之解怨釋  
兵同獎王室皆不聽弘又上表曰自頃兵戈紛亂猜禍  
蜂生疑隙構於羣王災難延於宗子今夕為忠明旦為  
逆翮其反而互為戎首載籍以來骨肉之禍未有如今

者也臣竊悲之今邊陲無備豫之儲中華有杼軸之困而股肱之臣不惟國體職競尋常自相楚剝萬一四夷乘虛為變此亦猛虎交鬪自效於卞莊者矣臣以為宜速發明詔詔越等令兩釋猜嫌各保分局自今以後其有不被詔書擅興兵馬者天下共伐之時太宰顓方拒關東倚喬為助不納其言喬乘虛襲許破之劉琨將兵救許不及遂與兄興及范陽王虓俱奔河北琨父母為喬所執劉弘以張方殘暴知顓必敗乃遣參軍劉盤為

都護帥諸軍受司空越節度 冬十一月立節將軍周  
權詐被檄自稱平西將軍復立羊后洛陽令何喬攻權  
殺之復廢羊后太宰顓矯詔以羊后屢為姦人所立遣  
尚書田淑敕留臺賜后死詔書屢至司隸校尉劉暉等  
上奏固執以為羊庶人門戶殘破廢放空宮門禁峻密  
無緣得與姦人構亂衆無愚智皆謂其寃今殺一枯窮  
之人而令天下傷慘何益於治顓怒遣吕朗收暉暉奔  
青州依高密王略然羊后亦以是得免 十二月吕

朗等東屯滎陽成都王穎進據洛陽 劉琨說冀州刺史太原溫羨使讓位於范陽王虓虓領冀州遣琨詣幽州乞師於王浚浚以突騎資之擊王闡於河上殺之琨遂與虓引兵濟河斬石超於滎陽劉喬自考城引退虓遣琨及督護田徽東擊東平王楙於廩丘楙走還國琨徽引兵東迎越擊劉祐於譙祐敗死喬衆遂潰喬犇平氏司空越進屯陽武王浚遣其將祁弘帥突騎鮮卑烏桓為越先驅

光熙元年

初太弟中庶子蘭陵繆播有寵於司空越

播從弟右衛率府太宰顥前妃之弟也越之起兵遣播  
肩詣長安說顥令奉帝還洛約與顥分陝為伯顥素信  
重播兄弟即欲從之張方自以罪重恐為誅首謂顥曰  
今據形勝之地國富兵彊奉天子以號令誰敢不從奈  
何拱手受制於人顥乃止及劉喬敗顥懼欲罷兵與山  
東和解恐張方不從猶豫未決方素與長安富人郅輔  
親善以為帳下督顥參軍河間畢垣嘗為方所侮因說

顓曰張方久屯霸上聞山東兵盛盤桓不進宜防其未  
萌其親信郅輔具知其謀繆播繆盾復說顓宜急斬方  
以謝山東可不勞而定顓使人召輔垣迎說輔曰張方  
欲反人謂卿知之王若問卿何辭以對輔驚曰實不聞  
方反為之奈何垣曰王若問卿但言爾爾不然必不免  
禍輔入顓問之曰張方反卿知之乎輔曰爾顓曰遣卿  
取之可乎又曰爾顓於是使輔送書於方因殺之輔既  
昵於方持刀而入守閤者不疑方火下發函輔斬其頭

還報顓以輔為定安太守送方頭於司空越以請和越  
不許宋曹襲河橋樓褒西走平昌公模遣前鋒督護馮  
嵩會宋曹逼洛陽成都王穎西奔長安至華陰聞顓已  
與山東和親留不敢進呂朗屯滎陽劉琨以張方首示  
之遂降甲子司空越遣祁弘宋曹司馬纂帥鮮卑西迎  
車駕以周馥為司隸校尉假節都督諸軍屯澠池夏  
四月己巳司空越引兵屯溫初太宰顓以為張方死  
東方兵必可解既而東方兵聞方死爭入關顓悔之乃

斬郅輔遣弘農太守彭隨北地太守刁默將兵拒祁弘  
等於湖五月壬辰弘等擊隨默大破之遂西入關又敗  
顯將馬瞻郭偉於霸水顯單馬逃入太白山弘等入長  
安所部鮮卑大掠殺二萬餘人百官奔散入山中拾橡  
實食之己亥弘等奉帝乘牛車東還以太弟太保梁柳  
為鎮西將軍守關中六月丙辰朔帝至洛陽復辛酉  
未大赦改元 馬瞻等入長安殺梁柳與始平太守梁  
邁共迎太宰顯於南山弘農太守裴廩秦國內史賈龕

定太守賈疋等起兵擊顓斬馬瞻梁邁疋討之曹孫也  
司空越遣督護康晃將兵擊顓至鄭顓使平北將軍牽  
秀屯馮翊顓長史楊騰詐稱顓命使秀罷兵騰遂殺秀  
關中皆服於越顓保城而已 秋八月以司空越為太

傅錄尚書事范陽王廙為司空鎮鄴平昌公模為鎮東  
大將軍鎮許昌王浚為驃騎大將軍都督東夷河北諸  
軍事領幽州刺史越以吏部郎潁川庾敳為軍諮祭酒  
前太弟中庶子胡母輔之為從事中郎黃門侍郎河南

郭象為主簿鴻臚水阮脩為行參軍謝鯤為掾輔之薦  
樂安光逸於越越亦辟之鼓等皆尚虛玄不以世務嬰  
心縱酒放誕鼓貨殖無厭象薄行好招權越皆以其名  
重於世故辟之 祁弘之入關也成都王穎自武關犇  
新野會新城元公劉弘卒司馬郭勣作亂欲迎穎為主  
治中順陽郭舒奉弘子璠以討勣斬之詔南中郎將劉  
陶收穎穎北渡河犇朝歌收故將士得數百人欲赴公  
師藩九月頓丘太守馮嵩執之送鄴范陽王虓不忍殺

而幽之公師藩自白馬南渡河兗州刺史苟晞討斬之  
進東嬴公騰爵為東燕王平昌公模為南陽王 冬  
十月范陽王虓薨長史劉輿以成都王穎素鄴人所  
附祕不發喪偽令人為臺使稱詔夜賜穎死并殺其二  
子穎官屬先皆逃散惟盧志隨從至死不急收而殯之  
太傅越台志為軍諮祭酒越將台劉輿或曰輿猶膩  
也近則汚人及至越疎之與密視天下兵薄及倉庫牛  
馬器械水陸之形皆默識之時軍國多事每會議自長

史潘滔以下莫知所對與應機辨畫越傾膝酬接以為  
左長史軍國之務悉以委之與說越遣其弟琨鎮井州以  
為北面之重越表琨為井州刺史以東燕王騰為車騎  
將軍都督鄴城諸軍事鎮鄴 十一月己巳夜帝

食麤中毒唐午崩于顯陽殿羊后自以於太弟熾為嫂恐  
不得為太后將立清河王暉侍中華混諫曰太弟在東  
宮已久民望素定今日寧可易乎即露板馳告太傅越  
召太弟入宮后已召暉至尚書閣疑變託疾而返癸酉

太弟即皇帝位大赦尊皇后曰惠皇后居弘訓宮追尊  
母王才人曰皇太后立妃梁氏為皇后懷帝始遵舊制  
於東堂聽政每至宴會輒與羣官論衆務考經籍黃門  
侍郎傅宣歎曰今日復見武帝之世矣 十二月太  
傅越以詔書徵河間王顓為司徒顓乃就徵南陽王模  
遣其將梁臣邀之於新安車上扼殺之并殺其三子  
劉琨至上黨東燕王騰即自井陘東下時井州饑饉數  
為胡寇所掠郡縣莫能自保州將田甄甄弟蘭任祉祁

濟李憚薄盛等及吏民萬餘人悉隨騰就穀冀州號為乞活所餘之戶不滿二萬寇賊縱橫道路斷塞琨募兵上黨得五百人轉鬪而前至晉陽府寺焚毀邑野蕭條琨撫循勞徠流民稍集

懷帝永嘉元年二月東萊王彌寇青徐二州自稱征東大將軍攻殺二千石太傅越以公車令東萊鞠羨為本郡太守以討彌擊殺之三月詔追復楊太后尊號丁卯改葬之謚曰武悼 庚午立清河王覃弟豫

章王詮為皇太子辛未大赦帝親覽大政留心庶事太  
傅越不悅固求出藩庚辰越出鎮許昌以高密王略  
為征南大將軍都督荊州諸軍事鎮襄陽南陽王模  
為征西大將軍都督秦雍梁益四州諸軍事鎮長安東  
燕王騰為新蔡王都督司冀二州諸軍事仍鎮鄴公  
師藩既死汲桑逃還苑中更聚衆劫掠郡縣自稱大將  
軍聲言為成都王報仇以石勒為前驅所嚮輒克署勒  
掃虜將軍遂進攻鄴時鄴中府庫空竭而新蔡武哀王

騰資用甚饒騰性吝嗇無所振惠臨急乃賜將士米各數升帛各丈尺以是人不為用夏五月桑大破魏郡太守馮嵩長驅入鄴騰輕騎出犇為桑將李豐所殺桑出成都王穎棺載之車中每事啓而後行遂燒鄴宮火旬日不滅殺士民萬餘人大掠而去濟自延津南擊兗州太傅越大懼使苟晞及將軍王讚等討之石勒與苟晞等相持於平原陽平間數月大小三十餘戰互有勝負秋七月己酉朔太傅越屯官渡為聲援己未

以琅邪王睿為安東將軍都督楊州江南諸軍事假節  
鎮建業 八月己卯朔苟晞擊汲桑於東武陽大破  
之桑退保清淵 九月戊申琅邪王睿至建業睿以  
安東司馬王導為謀主推心親信每事咨焉睿名論素  
輕吳人不附居久之士大夫莫有至者導患之會睿出  
觀襖導使睿乘肩輿具威儀導與諸名勝皆騎從紀瞻  
顧榮等見之驚異相帥拜於道左導因說睿曰顧榮賀  
循此土之望宜引之以結人心二子既至則無不來矣

睿乃使導躬造循榮二人皆應命而至以循為吳國內  
史榮為軍司加散騎常侍凡軍府政事皆與之謀議又  
以紀瞻為軍祭酒卞壺為從事中郎周玘為倉曹屬琅  
邪劉超為舍人張闓及魯國孔衍為參軍壺粹之子闓  
昭之曾孫也王導說睿謙以接士儉以足用以清靜為  
政撫綏新舊故江東歸心焉睿初至頗以酒廢事導以  
為言睿命酌引觴覆之於此遂絕 苟晞追擊汲桑破  
其八壘死者萬餘人桑與石勒收餘衆將奔漢藍州刺

史丁紹邀之於赤橋又破之桑犇馬牧勒犇樂平太傅  
越還許昌加苟晞撫軍將軍都督青兗諸軍事丁紹寧  
北將軍監冀州諸軍事皆假節 胡部大張匄督馮莫  
突等擁衆數千壁于上黨石勒往從之因說匄督等曰  
劉單于舉兵擊晉部大拒而不從自度終能獨立乎曰  
不能勒曰然則安可不早有所屬今部落皆已受單于  
賞募往往聚議欲叛部大而歸單于矣匄督等以為然  
冬十月匄督等隨勒單騎歸漢漢王淵署匄督為親漢

王莫突為都督部大以勒為輔漢將軍平晉王以統之  
烏桓張伏利度有衆二千壁于樂平澗屢招不能致勒  
偽獲罪於澗往犍伏利度伏利度喜結為兄弟使勒帥  
諸胡寇掠所向無前諸胡畏服勒知衆心之附已乃因  
會執伏利度謂諸胡曰今起大事我與伏利度誰堪為  
主諸胡咸推勒勒於是釋伏利度帥其衆歸漢澗加勒  
督山東征討諸軍事以伏利度之衆配之 十一月  
甲寅以尚書右僕射和郁為征北將軍鎮鄴乙亥以王

衍為司徒 十二月戊寅乞活田甄田蘭薄盛等起  
兵為新蔡王騰復讎斬汲桑于樂陵棄成都王穎棺於  
故井中穎故臣收葬之 前北軍中候呂雍度支校尉  
陳願等謀立清河王覃為太子事覺太傅越矯詔囚覃  
於金墉城 初太傅越與荀晞親善引升堂結為兄弟  
司馬潘滔說越曰兗州衝要魏武以之創業荀晞有大  
志非純臣也久令處之則患生心腹矣若遷于青州厚  
其名號晞必悅公自牧兗州經緯諸夏藩衛本朝此所

謂為之於未亂者也越以為然癸卯越自為丞相領兗州牧都督兗豫司冀幽并諸軍事以晞為征東大將軍開府儀同三司加侍中假節都督青州諸軍事領青州刺史封東平郡公越晞由是有隙 初陽平劉靈少貧賤力制犇牛走及犇馬時人雖異之莫能舉也靈撫膺歎曰天子何當亂也及公師藩起靈自稱將軍寇掠趙魏會王彌為苟純所敗靈亦為王讚所敗遂俱遣使降漢漢拜彌鎮東大將軍青徐二州牧都督綠海諸軍事

封東萊公以靈為平北將軍純晞之弟也

二年春正月漢王淵遣撫軍將軍聰等十將南據太山  
輔漢將軍石勒等十將東下趙魏 二月辛卯太傅  
越殺清河王覃 三月太傅越自許昌徙鎮甄城

王彌收集亡散兵復大振分遣諸將攻掠青徐兗豫四  
州所過攻陷郡縣多殺守令有衆數萬苟晞與之連戰  
不能克夏四月丁亥彌入許昌太傅越遣司馬王斌帥  
甲士五千人衛京師涼州刺史張軌亦遣督護北宮純

將兵衛京師五月彌入自轅轅敗官軍于伊北京師大震宮城門晝閉壬戌彌至洛陽屯于津陽門詔以王衍都督征討諸軍事甲子衍與王斌等出戰北宮純募勇士百餘人突陳彌兵大敗乙丑彌燒建春門而東衍遣左衛將軍王秉追之戰于七里澗又敗之彌走渡河與王桑自軹關如平陽漢王淵遣侍中兼御史大夫郊迎令曰孤親行將軍之館拂席洗爵敬待將軍及至拜司隸校尉加侍中特進以桑為散騎侍郎北宮純等與

漢劉聰戰於河東敗之 秋七月甲辰漢王淵寇平陽太守宋抽棄郡走河東太守路述戰死淵徙都蒲子上郡鮮卑陸逐延氏酋單徵並降於漢 八月丁亥太傅越自鄆城徙屯濮陽未幾又徙屯滎陽 九月漢

王彌石勒寇鄴和郁棄城走詔豫州刺史裴憲屯白馬以拒彌車騎將軍王堪屯東燕以拒勒平北將軍曹武屯大陽以備蒲子憲楷之子也 石勒劉靈帥衆三萬寇魏郡汲郡頓丘百姓望風降附者五十餘壘皆假壘

主將軍都尉印綬簡其彊壯五萬為軍士老弱安堵如故已酉勒執魏郡太守王粹于三臺殺之

三年春正月辛丑朔熒惑犯紫微漢太史令宣于脩之言於漢主淵曰不出三年必克洛陽蒲子崎嶇難以久安平陽氣象方昌請徙都之淵從之三月丁巳太

傅越自滎陽入京師中書監王敦謂所親曰太傅專執威權而選用表請尚書猶以舊制裁之今日之來必有所誅帝之為太弟也與中庶子繆播親善及即位以播

為中書監繆盾為太僕卿委以心膂帝舅散騎常侍王  
延尚書何綏太史令高堂沖並參機密越疑朝臣貳於  
已劉興潘滔勸越悉誅播等越乃誣播等欲為亂乙丑  
遣平東將軍王秉帥甲士三千入宮執播等十餘人於  
帝側付廷尉殺之帝歎息流涕而已綏曾之孫也初何  
曾侍武帝宴退謂諸子曰主上開創大業吾每宴見未  
嘗聞經國遠圖惟說平生常事非貽厥孫謀之道也及  
身而已後嗣其殆乎汝輩猶可以免指諸孫曰此屬必

及於難及綏死兄嵩哭之曰我祖其殆聖乎 臣光曰  
何曾譏武帝偷情取過目前不為遠慮知天下將  
亂子孫必與其憂何其明也然身為僭侈使子孫承  
流卒以驕奢亡族其明安在哉且身為宰相知其君之  
過不以告而私語於家非忠臣也 丁卯詔以王衍為  
太尉太傅越解兗州牧領司徒越以頃來興事多由殿  
省乃奏宿衛有侯爵者皆罷之時殿中武官並封侯由  
是出者略盡皆泣涕而去更使右衛將軍何倫左衛將

軍王秉領東海國兵數百人宿衛 左積弩將軍朱誕  
奔漢具陳洛陽孤弱勸漢主淵攻之淵以誕為前鋒都  
督以滅晉大將軍劉景為大都督將兵攻黎陽克之又  
敗王堪於延津沈男女三萬餘人於河淵聞之怒曰景  
何面復見朕且天道豈能容之吾所欲除者司馬氏耳  
細民何罪黜景為平虜將軍 夏漢安東大將軍石勒  
寇鉅鹿常山衆至十餘萬集衣冠人物別為君子營以  
趙郡張賓為謀主刁膺為股肱夔安孔萇支雄桃豹逮

明為爪牙并州諸胡羯多從之初張賓好讀書閣達有大志常自比張子房及石勒徇山東賓謂所親曰吾歷觀諸將無如此胡將軍者可與共成大業乃提劍詣軍門大呼請見勒亦未之奇也賓數以策干勒已而皆如所言勒由是奇之署為軍功曹動靜咨之漢主淵以王彌為侍中都督青徐兗豫荆揚六州諸軍事征東大將軍青州牧與楚王聰共攻壺關以石勒為前鋒都督劉琨遣護軍黃肅韓述救之聰敗述於西澗勒敗肅於

封田皆殺之太傅越遣淮南內史王曠將軍施融曹超  
將兵拒聰等曠濟河欲長驅而前融曰彼乘險間出我  
雖有數萬之衆猶是一軍獨受敵也且當阻水為固以  
量形勢然後圖之曠怒曰君欲沮衆邪融退曰彼善用  
兵曠闇於事勢吾屬今必死矣曠等踰太行與聰遇戰  
於長平之間曠兵大敗融超皆死聰遂破屯留長子凡  
斬獲萬九千級上黨太守龐淳以壺關降漢劉琨以都  
尉張倚領上黨太守據襄垣 秋八月漢主淵命楚

王聰等進攻洛陽詔平北將軍曹武等拒之皆為聰所  
敗聰長驅至宜陽自恃驟勝怠不設備九月弘農太守  
垣延詐降夜襲聰軍聰大敗而還 冬十月漢主淵  
復遣楚王聰王彌始安王曜汝陰王景帥精騎五萬寇  
洛陽大司空鴈門剛穆公呼延翼帥步卒繼之丙辰聰  
等至宜陽朝廷以漢兵新敗不意其復至大懼辛酉聰  
屯西明門北宮純等夜帥勇士千餘人出攻漢壁斬其  
征虜將軍呼延顥壬戌聰南屯洛水乙丑呼延翼為其

下所殺其衆自大陽潰歸澗救聰等還師聰表稱晉兵  
微弱不可以翼顯死故還師固請留攻洛陽澗許之太  
傅越嬰城自守戊寅聰親祈嵩山留平晉將軍安陽袁  
王厲冠軍將軍呼延朗督攝留軍太傅參軍孫詢說越  
乘虛出擊朗斬之厲赴水死王彌謂聰曰今軍旣失利  
洛陽守備猶固運車在陝糧食不支數日殿下不如  
與龍驤還平陽襄糧發卒更為後舉下官亦收兵穀待  
命於兗豫不亦可乎聰自以請留未敢還宣于脩之言

於淵曰歲在辛未乃得洛陽今晉氣猶盛大軍不歸必  
敗淵乃召聰等還十一月甲申漢楚王聰始安王  
曜歸于平陽王彌南出轅轅流民之在潁川襄城汝南  
南陽河南者數萬家素為居民所苦皆燒城邑殺二千  
石長吏以應彌石勒寇信都殺冀州刺史王斌王浚  
自領冀州詔車騎將軍王堪北中郎將裴憲將兵討勒  
勒引兵還拒之魏郡太守劉矩以郡降勒勒至黎陽裴  
憲棄軍奔淮南王堪退保倉垣十二月漢王彌表

左長史曹嶷行安東將軍東徇青州

四年春正月漢征東大將軍石勒濟河拔白馬王彌以  
三萬衆會之共寇徐豫兗州二月勒襲鄆城殺兗州刺  
史袁孚遂拔倉垣殺王堪復北濟河攻冀州諸郡民從  
之者九萬餘口 秋七月漢楚王聰始安王曜石勒  
及安北大將軍趙國圍河內太守裴整于懷詔征虜將  
軍宋抽救懷勒與平北大將軍王桑逆擊抽殺之河內  
人執整以降漢主淵以整為尚書左丞河內督將郭默

收整餘衆自為塢主劉琨以默為河內太守 己卯漢

主淵卒 九月雍州流民多在南陽詔書遣還鄉里

流民以關中荒殘皆不願歸征南將軍山簡南中郎將

杜襲各遣兵送之促期令發京兆王如遂潛結壯士夜

襲二軍破之於是馮翊嚴嶷京兆侯脫各聚衆攻城鎮

殺令長以應之未幾衆至四五萬自號大將軍領司雍

二州牧稱藩于漢 冬十月漢河內王粲始安王曜

及王彌帥衆四萬寇洛陽石勒帥騎二萬會粲于大陽

敗監軍裴邈于澠池遂長驅入洛川檄出轅轅掠梁陳  
汝潁間勒出成臯關壬寅圍陳留太守王讚於倉垣為  
讚所敗退屯文石津京師饑困日甚太傅越遣使以  
羽檄徵天下兵使入援京師帝謂使者曰為我語諸征  
鎮今日尚可救後則無及矣既而卒無至者征南將軍  
山簡遣督護王萬將兵入援軍於涇陽為王如所敗如  
遂大掠沔漢進逼襄陽簡嬰城自守荊州刺史王澄自  
將欲援京師至沔口聞簡敗衆散而還朝議多欲遷都

以避難王衍以為不可賣車牛以安衆心山簡為嚴嶷所逼自襄陽徙屯夏口石勒引兵濟河將趨南陽王如侯脫嚴嶷等聞之遣衆一萬屯襄城以拒勒勒擊之盡俘其衆進屯宛北是時侯脫據宛王如據穰如素與脫不協遣使重賂勒結為兄弟說勒使攻脫勒攻宛克之嚴嶷引兵救宛不及而降勒斬脫囚嶷送于平陽盡并其衆遂南寇襄陽攻拔江西壘壁三十餘所還趨襄城王如遣弟瑒襲勒勒迎擊滅之復屯江西太傅越

既殺王延等大失衆望又以胡寇益盛內不自安乃戎服入見請討石勒且鎮集充豫帝曰今胡虜侵逼郊畿人無固志朝廷社稷倚賴於公豈可遠出以孤根本對曰臣出幸而破賊則國威可振猶愈於坐待困窮也十一月甲戌越帥甲士四萬向許昌留妃裴氏世子毗及龍驤將軍李暉右衛將軍何倫守衛京師防察宮省以潘滔為河南尹總留事越表以行臺自隨用太尉衍為軍司朝賢素望悉為佐吏名將勁卒咸入其府於是宮

省無復守衛荒饑日甚殿內死人交橫盜賊公行府寺營署並掘塹自守越東屯項以馮嵩為左司馬自領豫州牧竟陵王棼白帝遣兵襲何倫不克帝委罪於棼棼逃竄得免 揚州都督周馥以洛陽孤危上書請遷都壽春太傅越以馥不先白已而直上書大怒召馥及淮南太守裴頡馥不肯行令頡帥兵先進頡詐稱受越密旨襲馥為馥所敗退保東城 初帝以王彌石勒侵逼京畿詔苟晞督帥州郡討之會曹嶷破琅邪北收齊地

兵勢甚盛苟純閉城自守晞還救青州與嶷連戰破之  
五年春正月苟晞為曹嶷所敗棄城奔高平 裴頌

求救琅邪王睿睿使揚威將軍甘卓等攻周馥於壽  
春馥衆潰奔項新蔡王確執之馥憂憤而卒確騰之  
子 二月石勒攻新蔡殺新蔡莊王確於南頓進拔  
許昌殺平東將軍王康 東海孝獻王越既與苟晞  
有隙河南尹潘滔尚書劉望等復從而譖之晞怒  
表求滔等首陽言司馬元超為宰相不平使天下

淆亂苟道將豈可以不義使之乃移檄諸州自稱功伐  
陳越罪狀帝亦惡越專權多違詔命所留將士何倫等  
抄掠公卿逼辱公主密賜晞手詔使討之晞數與帝文  
書往來越疑之使遊騎於成臯間伺之果獲晞使及詔  
書乃下檄罪狀晞以從事中郎楊瑁為兖州刺史使與  
徐州刺史裴盾共討晞晞遣騎收潘滔滔夜遁得免執  
尚書劉曾侍中程延斬之越憂憤成疾以後事付王衍  
三月丙子薨于項祕不發喪衆共推衍為元帥衍不敢

當以讓襄陽王範範亦不受範瑋之子也於是衍等相  
與奉越喪還葬東海何倫李暉等聞越薨奉裴妃及世  
子毗自洛陽東走城中士民爭隨之帝追貶越為縣王  
以苟晞為大將軍大都督督青徐兗豫荆揚六州諸軍  
事夏四月石勒帥輕騎追太傅越之喪及於苦縣  
甯平城大敗晉兵縱騎圍而射之將士十餘萬人相踐  
如山無一人得免者執太尉衍襄陽王範任城王濟武陵  
莊王澹西河王喜梁懷王禧齊王超吏部尚書劉望廷

尉諸葛銓豫州刺史劉喬太傅長史庾敳等坐之幕下  
問以晉故衍具陳禍敗之由云計不在已且自言少無  
宦情不豫世事因勸勒稱尊號冀以自免勒曰君少壯  
登朝名蓋四海身居重任何得言無宦情邪破壞天下  
非君而誰命左右扶出衆人畏死多自陳述獨襄陽王  
範神色儼然顧呵之曰今日之事何復紛紜勒謂孔萇  
曰吾行天下多矣未嘗見此輩人當可存乎萇曰彼皆  
晉之王公終不為吾用勒曰雖然要不可加以鋒刃夜使

人排牆殺之濟宣帝弟子景王陵之子禧澹之子也剖  
越柩焚其尸曰亂天下者此人也吾為天下報之故焚  
其骨以告天地何倫等至洧倉遇勒戰敗東海世子毗  
及宗室四十八王皆沒於勒何倫犇下邳李暉犇廣宗  
裴妃為人所掠賣久之渡江初琅邪王睿之鎮建業裴  
妃意也故睿德之厚加存撫以其子冲繼越後五月以  
太子太傅傳祗為司徒尚書令荀藩為司空加王浚大  
司馬侍中大都督督幽冀諸軍事南陽王模為太尉大

都督張軌為車騎大將軍琅邪王睿為鎮東大將軍兼督揚江湘交廣五州諸軍事苟晞表請遷都倉垣使從事中郎劉會將船數十艘宿衛五百人穀千斛迎帝帝將從之公卿猶豫左右戀資財遂不果行既而洛陽饑困人相食百官流亡者什八九帝召公卿議將行而衛從不備帝撫手嘆曰如何曹無車輿乃使傳祇出詣河陰治舟楫朝士數十人導從帝步出西掖門至銅駝街為盜所掠不得進而還度支校尉東郡魏浚帥流民數

百家保河陰之峽石時劫掠得穀麥獻之帝以為揚威將軍平陽太守度支如故漢主聰使前軍大將軍呼

延晏將兵二萬七千寇洛陽比及河南晉兵前後十二敗死者三萬餘人始安王曜王彌石勒皆引兵會之未至晏留輜重於張方故壘癸未先至洛陽甲申攻平昌門丙戌克之遂焚東陽門及諸府寺六月丁亥朔晏以外繼不至俘掠而去帝具舟於洛水將東走晏盡焚之庚寅荀藩及弟光祿大夫組奔轅轅辛卯王彌至宣陽

門壬辰始安王曜至西明門丁酉王彌呼延晏克宣陽  
門入南宮升太極前殿縱兵大掠悉收宮人珍寶帝出  
華林園門欲奔長安漢兵追執之幽於端門曜自西明  
門入屯武庫戊戌曜殺太子詮吳孝王晏竟陵王棼石  
僕射曹馥尚書閭丘沖河南尹劉默等士民死者三萬  
餘人遂發掘諸陵焚宮廟官府皆盡曜納惠帝羊皇后  
遷帝及六璽於平陽石勒引兵出轅轅屯許昌光祿大  
夫劉蕃尚書盧志奔并州丁未漢主聰大赦改元嘉平

以帝為特進左光祿大夫封平阿公以侍中庾珉王雋  
為光祿大夫岷鼓之兄也初始平王曜以王彌不待已  
至先入洛陽怨之彌說曜曰洛陽天下之中山河四塞  
城池宮室不假修營宜自主上自平陽徙都之曜以天  
下未定洛陽四面受敵不可守不用彌策而焚之彌罵  
曰屠各子豈有帝王之意邪遂與曜有隙引兵東屯項  
關前司隸校尉劉暉說彌曰今九州糜沸羣雄競逐將  
軍於漢建不世之功又與始安王相失將何以自容不

如東據本州徐觀天下之勢上下以混壹四海下不失鼎峙之業策之上者也彌心然之 司徒傅祗建行臺於

河陰司空荀藩在陽城河南尹華薈在成臯汝陰太守平陽李矩為之立屋輸穀以給之薈歆之曾孫也藩與弟組族子中護軍崧薈與弟中領軍恒建行臺於密傳檄四方推琅邪王睿為盟主藩承制以崧為襄城太守矩為滎陽太守前冠軍將軍河南褚翼為梁國內史揚威將軍魏浚屯洛北石梁塢劉琨承制假浚河南尹浚

詣荀藩詔謀軍事藩邀李矩伺會矩夜赴之矩官屬皆  
曰浚不可信不宜夜往矩曰忠臣同心何所疑乎遂往  
相與結歡而去浚族子該聚衆據一泉塢藩以為武威  
將軍豫章王端太子詮之弟也東奔倉垣荀晞帥羣官  
奉以為皇太子置行臺端承制以晞領太子太傅都督  
中外諸軍錄尚書事自倉垣徙屯蒙城撫軍將軍秦王  
業吳孝王之子荀藩之甥也年十二南奔密藩等奉之  
南趣許昌前豫州刺史天水閭鼎聚西州流民數千人

於密欲還鄉里荀藩以鼎有才而擁衆用鼎為豫州刺史以中書令李絙司徒左長史彭城劉疇鎮軍長史周顗司馬李述等為之參佐顗浚之子也時海內大亂獨江東差安中國士民避亂者多南渡江鎮東司馬王導說琅邪王睿收其賢俊與之共事睿從之辟掾屬百餘人時人謂之百六掾以前潁川太守渤海刁協為軍諮祭酒前東海太守王承廣陵相卞壺為從事中郎江寧令諸葛恢歷陽參軍陳國陳顗為行參軍前太博掾庾

亮為西曹掾 南陽王模使牙門趙染戒蒲坂染帥衆  
降漢漢兵圍長安模戰敗遂降於漢九月河內王粲殺  
模關西饑饉白骨蔽野士民存者百無一二聰以始安  
王曜為車騎大將軍雍州牧更封中山王鎮長安以王  
彌為大將軍封齊公 苟晞驕奢苛暴衆心離怨加以疾  
疫饑饉石勒攻王讚於陽夏擒之遂襲蒙城執晞及豫  
章王端鎖晞頸以為左司馬漢主聰拜勒幽州牧王彌  
與勒外相親而內相忌彌聞勒擒苟晞心惡之以書賀

勒曰公獲苟晞而用之何其神也使晞為公左彌為公右天下不足定也勒謂張賓曰王公位重而言卑其圖我必矣賓因勸勒乘彌小衰誘而取之 冬十月勒

請彌燕于已吾酒酣勒手斬彌而并其衆表漢主聰稱彌叛逆聰大怒遣使讓勒專害公輔有無君之心然猶加勒鎮東大將軍督并幽二州諸軍事領并州刺史以慰其心苟晞王讚潛謀叛勒殺之并晞弟純勒引兵掠豫州諸郡臨江而還屯于葛陂 初南陽王模以從

事中郎索綝為馮翊太守綝靖之子也模死綝與安夷  
護軍金城麴允頻陽令梁肅俱奔安定時安定太守賈  
疋與諸氏羗皆送任子於漢綝等遇之於陰密擁還臨  
涇與疋謀興復晉室疋從之乃共推疋為平西將軍帥  
衆五萬向長安雍州刺史麴特新平太守竺恢皆不降  
於漢聞疋起兵與扶風太守梁綜帥衆十萬會之綜肅  
之兄也漢河內王粲在新豐使其將劉雅趙染攻新平  
不克索綝救新平大小百戰雅等敗退中山王曜與疋

等戰於黃丘曜衆大敗足遂襲漢梁州刺史彭蕩仲殺之麴特等擊破粲於新豐粲還平陽於是足等兵勢大振關西胡晉翕然響應閭鼎欲奉秦王業入關據長安以號令四方河陰令傅暢祗之子也亦以書勸之鼎遂行荀藩劉疇周顗李述等皆山東人不欲西行中途逃散鼎遣兵追之不及殺李絙等鼎與業自宛趣武關遇盜於上洛士卒敗散收其餘衆進至藍田使人告賈足足遣兵迎之十二月入于雍城使梁綜將兵衛之周顗

奔琅邪王睿睿以顗為軍諮祭酒前騎都尉譙國桓彝亦避亂過江見睿微弱謂顗曰我以中州多故來此求全而單弱如此將何以濟既而見王導共論世事退謂顗曰向見管夷吾無復憂矣諸名士相與登新亭遊宴周顗中坐歎曰風景不殊舉目有江河之異因相視流涕王導愀然變色曰當共戮力王室克復神州何至作楚囚對泣邪衆皆收淚謝之陳顗遺王導書曰中華所以傾弊者正以取才失所先名望而後實事浮競驅馳

互相薦薦言重者先顯言輕者後叙遂相波扇乃至陵  
遲加有莊老之俗傾感朝廷養望者為弘雅政事者為  
俗人王職不卹法物墜喪夫欲制遠先由近始今宜改  
張明賞信罰拔卓茂於密縣顯朱邑於桐鄉然後大業  
可舉中興可冀耳導不能從

六年春正月漢鎮北將軍靳冲平北將軍卜珣冠并州  
辛未圍晉陽 二月石勒築壘於葛陂課農造舟將  
攻建業琅邪王睿大集江南之衆於壽春以鎮東長史

紀瞻為揚威將軍都督諸軍以討之會大雨三月不止  
勒軍中飢疫死者大半聞晉軍將至集將佐議之右長  
史刁膺請先送款於睿求掃平河朔以自贖俟其軍退  
徐更圖之勒愀然長嘯中堅將軍夔安請就高避水勒  
曰將軍何怯邪孔萇等三十餘將請各將兵分道夜攻  
壽春斬吳將頭據其城食其粟要以今年破丹陽定江  
南勒笑曰是勇將之計也各賜鎧馬一疋顧謂張賓賓曰  
將軍攻陷京師囚執天子殺害王公妻略妃主擢將軍

之髮不足以數將軍之罪奈何復相臣奉乎去年既殺王彌不當來此今天降霖雨於數百里中示將軍不應留此也鄴有三臺之固西接平陽山河四塞宜北徙據之以經營河北河北既定天下無處將軍之右者矣晉之保壽春畏將軍往攻之耳彼聞吾去喜於自全何暇追襲吾後為吾不利邪將軍宜使輜重從北道先發將軍引大兵向壽春輜重既遠大兵徐還何憂進退無地乎勒攘袂鼓髯曰張君計是也責刁膺曰君既相輔佐

當共成大功奈何遽勸孤降此策應斬然素知君怯特  
相宥耳於是黜膺為將軍擢賓為右長史號曰右侯勒  
引兵發葛陂遣石虎帥騎二千向壽春遇晉運船虎將  
士爭取之為紀瞻所敗瞻追奔百里前及勒軍勒結陳  
待之瞻不敢擊退還壽春漢主聰封帝為會稽郡公  
加儀同三司聰從容謂帝曰卿昔為豫章王朕與王武  
子造卿武子稱朕於卿卿言聞其名久矣贈卿柘弓銀  
研卿頗記否帝曰臣安敢忘之但恨爾日不早識龍顏

聰曰卿家骨肉何相殘如此帝曰大漢將應天受命故為陛下自相驅除此殆天意非人事也且臣家若能奉武皇帝之業九族敦睦陛下何由得之聰喜以小劉貴人妻帝曰此名公之孫也卿善遇之代公猗盧遣兵救晉陽三月乙未漢兵敗走卜瑒之卒先奔斬冲擅收瑒斬之聰大怒遣使持節斬冲賈尺等圍長安數月漢中山王曜連戰皆敗驅掠士女八萬餘口奔于平陽秦王業自雍入于長安五月漢主聰敗曜為龍驤大將

軍行大司馬聰使河內王粲攻傅祗於三渚石將軍劉  
參攻郭默於懷會祗病薨城陷粲遷祗子孫并其士民  
一萬餘戶于平陽石勒自葛陂北行所過皆堅壁清  
野虜掠無所獲軍中飢甚士卒相食至東燕聞汲郡向  
冰聚衆數千壁枋頭勒將濟河恐冰邀之張賓曰聞冰  
船盡在瀆中未上宜遣輕兵間道襲取以濟大軍大軍  
既濟冰必可擒也秋七月勒使支雄孔萇自文石  
津縛筏潛渡取其船勒引兵自棘津濟河擊冰大破之

盡得其資儲軍勢復振遂長驅至鄴劉演保三臺以自  
固臨深牟穆等復帥其衆降於勒諸將欲攻三臺張賓  
曰演雖弱衆猶數千三臺險固攻之未易猝拔捨而去  
之彼將自潰方今王彭祖劉越石公之大敵也宜先取  
之演不足顧也且天下饑亂明公雖擁大兵遊行羈旅  
人無定志非所以保萬全制四方也不若擇便地而據  
之廣聚糧儲西稟平陽以圖幽并此霸王之業也邯鄲  
襄國形勝之地請擇一而都之勒曰右侯之計是也遂

進據襄國賓復言於勒曰今吾居此彭祖越石所深忌也恐城塹未固資儲未廣二寇交至宜亟收野穀且遣使至平陽具陳鎮此之意勒從之分命諸將攻冀州郡縣壁壘多降運其穀以輸襄國且表於漢主聰聰以勒為都督冀幽并營四州諸軍事冀州牧進封上黨公劉琨移檄州郡期以十月會平陽擊漢琨素奢豪喜聲色河南徐潤以音律得幸於琨琨以為晉陽令潤驕恣干預政事護軍令狐盛數以為言且勸琨殺之琨不從

潤諧盛於琨琨收盛殺之琨母曰汝不能駕御豪傑以  
恢遠畧而專除勝已禍必及我盛子泥奔漢且言虛實  
漢主聰大喜遣河內王粲中山王曜將兵寇并州以令  
狐泥為鄉導琨聞之東出收兵於常山及中山使其將  
郝詵張喬將兵拒粲且遣使求救於代公猗盧詵喬俱  
敗死粲曜乘虛襲晉陽太原太守高喬并州別駕郝聿  
以晉陽降漢八月庚戌琨還救晉陽不及帥左右數十  
騎奔常山辛亥粲曜入晉陽壬子令狐泥殺琨父母粲

曜送尚書盧志侍中許遐太子右衛率崔瑋于平陽聰  
復以曜為車騎大將軍以前將軍劉豐為并州刺史鎮  
晉陽 九月聰以盧志為太弟太師崔瑋為太傅許  
遐為太保高喬令狐泥皆為武衛將軍 辛巳賈疋等

奉秦王業為皇太子建行臺於長安登壇告類建宗廟  
社稷大赦以閭鼎為太子詹事總攝百揆加賈疋征西  
大將軍以秦州刺史南陽王保為大司馬命司空荀藩督  
攝遠近光祿大夫荀組領司隸校尉行豫州刺史與藩

共保開封 冬十月代公猗盧遣其子六修及兄子  
普根將軍衛雄范班箕澹帥衆數萬為前鋒以攻晉陽  
猗盧自帥衆二十萬繼之劉琨收散卒數千為之鄉導  
六修與漢中山王曜戰於汾東曜兵敗墜馬中七創討  
虜將軍傅虎以馬授曜曜不受曰卿當乘以自免吾創  
已重自分死此虎泣曰虎蒙大王識拔至此常思効命  
今其時矣且漢室初基天下可無虎不可無大王也乃  
扶曜上馬驅令渡汾自還戰死曜入晉陽夜與大將軍

聚鎮北大將軍豐掠晉陽之民踰蒙山而歸十一月猗  
盧追之戰於藍谷漢兵大敗擒劉豐斬邢延等三千餘  
級伏尸數百里猗盧因大獵壽陽山陳閱皮肉山為之  
赤劉琨自營門步入拜謝固請進軍猗盧曰吾不早來  
致卿父母見害誠以相愧今卿已復州境吾遠來士馬  
疲弊且待後舉劉聰未可滅也遺琨馬牛羊各千餘疋  
車百乘而還留其將箕澹段繁等戍晉陽琨徙居陽曲  
招集亡散盧諶為劉聚參軍亡歸琨漢人殺其父志及

弟謚詵贈傅虎幽州刺史 十二月彭天護攻賈足

殺之閻鼎殺梁綜麴允索繼等攻鼎鼎奔雍為氏所殺  
愍帝建興元年春正月丁丑朔漢主聰宴羣臣於光極  
殿使懷帝著青衣行酒庾珉王雋等不勝悲憤因號哭  
聰惡之有告珉等謀以平陽應劉琨者 二月丁未

聰殺珉雋等故晉臣十餘人懷帝亦遇害 荀崧曰懷

帝天姿清劬少著英猷若遇承平足為守文佳主而繼  
惠帝擾亂之後東海專政故無幽厲之釁而有流亡之

禍矣 夏四月丙午懷帝凶問至長安皇太子舉哀  
因加元服壬申即皇帝大赦改元以衛將軍梁芬為司  
徒雍州刺史麴允為尚書左僕射錄尚書事京兆太守  
索綝為尚書右僕射領吏部京兆尹是時長安城中戶  
不盈百蒿棘成林公私有車四乘百官無章服印綬唯  
桑版署號而已尋以索綝為衛將軍領太尉軍國之事  
悉以委之 漢中山王曜司隸校尉喬智明寇長安平  
西將軍趙染帥衆赴之詔麴允屯黃白城以拒之 石

勒使石虎攻鄴鄴潰劉演奔廩丘三臺流民皆降於勒  
勒以桃豹為魏郡太守以撫之久之以石虎代豹鎮鄴

五月壬辰以琅邪王睿為左丞相大都督陝東  
諸軍事南陽王保為右丞相大都督陝西諸軍事詔  
曰今當掃除鯨鯢奉迎梓宮令幽并兩州勒卒三十萬  
直造平陽右丞相宜帥秦涼梁雍之師三十萬徑詣長  
安左丞相帥所領精兵二十萬徑造洛陽同赴大期克  
成元勳 漢中山王曜屯蒲坂 六月劉琨與代公

猗盧會于陁北謀擊漢秋七月琨進據藍谷猗盧遣拓跋普根屯于北屈琨遣監軍韓據自西河而南將攻西平漢主聰遣大將軍粲等拒琨驃騎將軍易等拒普根蕩晉將軍蘭陽等助守西平琨等聞之引兵還聰使軍仍屯所在為進取之計帝遣殿中都尉劉蜀詔左丞相睿以時進軍與乘輿會除中原八月癸亥蜀至建康睿辭以方平定江東未暇北伐以鎮東長史刁協為丞相左長史從事中郎彭城劉隗為司直邵陵內史廣陵

戴邈為軍諮祭酒參軍丹楊張闓為從事中郎尚書郎  
潁川鍾雅為記室參軍譙國桓宣為舍人豫章熊遠為  
主簿會稽孔愉為掾劉隗雅習文史善伺候睿意故睿  
特親愛之 秋九月漢中山王曜趙染攻麴允于黃白  
城允累戰皆敗詔以索綝為征東大將軍將兵助允

冬十月漢趙染謂中山王曜曰麴允帥大衆在外長  
安空虛可襲也曜使染帥精騎五千襲長安庚寅夜入  
外城帝奔射鴈樓染焚龍尾及諸營殺掠千餘人辛卯

旦退屯逍遙園壬辰將軍麴璆自阿城帥衆五千救長  
安癸巳染引還璆追之與曜遇於零武璆兵大敗漢  
中山王曜恃勝而不設備十一月麴允引兵襲之漢兵  
大敗殺其冠軍將軍喬智明曜引歸平陽

二年夏五月漢中山王曜趙染寇長安六月曜屯渭汭  
染屯新豐索綝將兵出拒之染有輕綝之色長史魯徽  
曰晉之君臣自知彊弱不敵將致死於我不可輕也染  
曰以司馬模之彊吾取之如拉朽索綝小豎豈能汚吾

馬蹄刀刃邪晨帥輕騎數百逆之曰要當獲絀而後食  
絀與戰于城西染兵敗而歸悔曰吾不用魯微之言以至  
此何面目見之先命斬徽徽曰將軍愚復以取敗乃復  
忌前害勝誅忠良以逞忿猶有天地將軍其得死於枕  
席乎詔加索絀驃騎大將軍尚書左僕射錄尚書承制  
行事曜染復與將軍殷凱帥衆數萬向長安麴允逆戰  
於馮翊允敗收兵夜襲凱營凱敗死曜乃還攻河內太  
守郭默于懷列三屯圍之默食盡送妻子為質請糴於

曜翟畢復嬰城固守曜怒沈默妻子于河而攻之默欲  
投李矩於新鄭矩使其甥郭誦迎之兵少不敢進會劉  
琨遣參軍張肇帥鮮卑五百餘騎詣長安道阻不通還  
過矩營矩說肇使擊漢兵漢兵望見鮮卑不戰而走默  
遂帥衆歸矩漢主聰召曜還屯蒲阪 秋趙染攻北  
地麴允拒之染中弩而死

三年春二月丙子以琅邪王睿為丞相大都督督中外諸軍  
事南陽王保為相國荀組為太尉領豫州牧劉琨為司空都

督并冀幽三州諸軍事琨辭司空不受 夏六月漢大司馬  
曜攻上黨秋八月癸亥敗劉琨之衆於襄垣曜欲進攻陽曲  
漢主聰遣使謂之曰長安未平宜以為先曜乃還屯蒲阪  
秋九月漢大司馬曜寇北地詔以麴允為大都督驃  
騎將軍以禦之冬十月以索綝為尚書僕射都督宮城  
諸軍事曜進拔馮翊太守梁肅奔萬年曜轉寇上郡麴  
允去黃白城軍於靈武以兵弱不敢進帝屢徵兵於丞  
相保保左右皆曰蝮蛇螫手壯士斷腕今胡寇方盛且

宜斷隴道以觀其變從事中郎裴詵曰今虵已螫頭頭  
可斷乎保乃以鎮軍將軍胡崧行前鋒都督須諸軍集  
乃發麴允欲奉帝往就保索綝曰保得天子必逞其私  
志乃止於是自長安以西不復貢奉朝廷百官饑乏採  
稻以自存

四年秋七月漢大司馬曜圍北地太守麴昌大都督麴  
允將步騎三萬救之曜繞城縱火煙起蔽天使反間結  
允曰郡城已陷往無及也衆懼而潰曜追敗允於磻石

谷允奔還靈武曜遂取北地允性仁厚無威斷喜以爵位悅人新平太守竺恢始平太守楊像扶風太守竺爽安定太守焦嵩皆領征鎮杖節加侍中常侍村塢主帥小者猶假銀青將軍之號然恩不及下故諸將驕恣士卒離怨關中危亂允告急於焦嵩嵩素侮允曰須允困當救之曜進至涇陽渭北諸城悉潰 八月漢大司

馬曜逼長安 九月焦嵩竺恢宋哲皆引兵救長安

散騎常侍華輯監京兆馮翊弘農上洛四郡兵屯霸上

皆畏漢兵彊不敢進相國保遣胡崧將兵入援擊漢大  
司馬曜於靈臺破之崧恐國威復振則麴索勢盛乃帥  
城西諸郡兵屯渭北不進遂還槐里曜攻陷長安外城  
麴允索縋退守小城以自固內外斷絕城中饑甚米斗  
直金二兩人相食死者太半亡逃不可制唯涼州義衆  
千人守死不移太倉有麴數十餅麴允屑之為粥以供  
帝既而亦盡冬十一月帝泣謂允曰今窮厄如此外無  
救援當忍耻出降以活士民因歎曰誤我事者麴索二

公也使侍中宗敞送降牋於曜索絀潛留敞使其子說  
曜曰今城中食猶足支一年未易克也若許絀以車騎  
儀同萬戶郎公者請以城降曜斬而送之曰帝王之師  
以義行也孤將兵十五年未嘗以詭計敗人必窮兵極  
勢然後取之今索絀所言如此天下之惡一也輒相為  
戮之若兵食審未盡者便可勉強固守如其糧竭兵微  
亦宜早寤天命甲午宗敞至曜營乙未帝乘羊車向祖  
衙壁輿觀出東門降羣臣號泣攀車執帝手帝亦悲不

自勝御史中丞馮翊吉朗歎曰吾智不能謀勇不能死  
何忍君臣相隨北面事賊虜乎乃自殺曜焚櫬受壁使  
宗敞奉帝還宮丁酉遷帝及公卿以下於其營辛丑送  
至平陽壬寅漢主聰臨光極殿帝稽首於前翹允伏地  
慟哭扶不能起聰怒囚之允自殺聰以帝為光祿大夫  
封懷安侯以大司馬曜為假黃鉞大都督陝西諸軍  
事太宰封秦王大赦改元麟嘉以翹允忠烈贈車騎將  
軍諡節愍侯以索綝不忠斬於都市尚書梁允侍中梁

濟等及諸郡中皆為曜所殺華輯奔南山 于寶論曰  
昔高祖宣皇帝以雄才碩量應時而起性深阻有若城  
府而能寬綽以容納行數術以御物而知人善采拔於  
是百姓與能大衆始構世宗承基太祖繼業咸黜異圖  
用融前烈至於世祖遂享皇極仁以厚下儉以足用和  
而不弛寬而能斷掩唐虞之舊域班正朔於八荒于時  
有天下無窮人之諺雖太平未洽亦足以明民樂其生  
矣武皇既崩山陵未乾而變難繼起宗子無維城之助

師尹無具瞻之貴朝為伊周夕成桀跖國政迭移於亂  
人禁兵外散於四方方岳無鈞石之鎮關門無結草之  
固戎羯稱制二帝失尊何哉樹立失權付託非才四維  
不張而苟且之政多也夫基廣則難傾根深則難拔理  
節則不亂膠結則不遷昔之有天下者所以能長久用  
此道也周自后稷愛民十六王而武始君之其積基樹  
本如此其固今晉之興也其創基立本固異於前代矣  
加以朝寡純德之人鄉之不貳之老風俗淫僻恥尚失

所學者以莊老為宗而黜六經談者以虛蕩為辯而賤名檢行身者以放濁為通而狹節信進仕者以苟得為貴而鄙居正當官者以望空為高而笑勤恪是以劉頌屢言治道傳咸每糾邪正皆謂之俗吏其倚仗虛曠依阿無心者皆名重海內若夫文王日昃不暇食仲山甫夙夜匪懈者蓋共嗤黜以為灰塵矣由是毀譽亂於善惡之實情慝辨於貨欲之塗選者為人擇官官者為身擇利世族貴戚之子弟陵邁超越不拘資次悠悠風塵

皆奔競之士列官千百無讓賢之舉子真著宗讓而莫  
之省子雅制九班而不得用其婦女不知女工任情而  
動有逆于舅姑有殺戮妾媵父兄弗之罪也天下莫之  
非也禮灋刑政於此大壞國之將亡本必先顛其此之  
謂乎故觀阮籍之行而覺禮教崩弛之所由察庾純賈  
充之爭而見師尹之多僻考平吳之功而知將帥之不  
讓思郭欽之謀而寤戎狄之有釁覽傳玄劉毅之言而  
得百官之邪核傅咸之奏錢神之論而覩寵賂之彰民

風國勢既已如此雖以中庸之才守文之主治之猶懼致亂況我惠帝以放蕩之德臨之哉懷帝承亂即位羈以彊臣愍帝奔播之後徒守虛名天下之勢既去非命世之雄才不能復取之矣冬十二月丞相睿聞長安不守出師露次躬擐甲胄移檄四方刻日北征以漕運稽期丙寅斬督運令史淳于伯刑者以刀拭柱血逆流上至柱末二丈餘而下觀者咸以為冤丞相司直劉隗上言伯罪不至死請免從事中郎周筵等官於是右將軍王

導等上疏引咎請解職。睿曰：「政刑失中，皆吾闇塞所致，一無所問。」

元帝建武元年春正月，宋哲奔江東。二月辛巳，宋哲至建康，稱受愍帝詔，令丞相琅邪王睿統攝萬機。三月，琅邪王素服出次，舉哀三日。於是西陽王柔及官屬等共上尊號。王不許。柔等固請不已。王慨然流涕曰：「孤罪人也。諸賢見逼不已，當歸琅邪耳。」呼私奴命駕將歸國。柔等乃請依魏晉故事，稱晉王。許之。辛卯，即晉王位。大赦。

改元始備百官立宗廟建社稷有司請立太子王愛次子宣城公裒欲立之謂王導曰立子當以德導曰世子宣城俱有朗雋之美而世子年長王從之丙辰立世子紹為王太子封裒為琅邪王奉恭王後仍以裒都督青徐兗三州諸軍事鎮廣陵以西陽王漾為太保封譙剛王遜之子承為譙王遜宣帝之弟子也又以征南大將軍王敦為大將軍江州牧揚州刺史王導為驃騎將軍都督中外諸軍事領中書監錄尚書事丞相左長史刁

協為尚書左僕射右長史周顓為吏部尚書軍諮祭酒  
賀循為中書令右司馬戴淵王邃為尚書司直劉隗為  
御史中丞行參軍劉超為中書舍人參軍事孔愉長兼  
中書郎自餘參軍悉拜奉車都尉掾屬拜駙馬都尉行  
參軍舍人拜騎都尉王敦辭州牧王導以敦統六州辭  
中外都督賀循以老病辭中書令王皆許之以循為太  
常是時承喪亂之後江東草創刁協久宦中朝諳練舊  
事賀循為世儒宗明習禮學凡有疑議皆取決焉

夏六月丙寅溫嶠等至建康王導周顗庾亮等皆愛嶠才爭與之交是時太尉豫州牧荀組冀州刺史邵續青州刺史曹嶷寧州刺史王遜東夷校尉崔毖等皆上表勸進王不許冬十一月漢主聰出畋以愍帝行車騎將軍戎服執戟前導見者指之曰此故長安天子也聚而觀之故老有泣者太子粲言於聰曰昔周武王豈樂殺紂乎正恐同惡相求為患故也今興兵聚衆者皆以子業為名不如早除之聰曰吾前殺庾珉革而民心


猶如是吾未忍復殺也且小觀之十二月聰饗羣臣於  
光極殿使愍帝行酒洗爵已而更衣又使之執蓋晉臣  
多涕泣有失聲者尚書郎隴西辛賓起抱帝大哭聰命  
引出斬之趙固與河內太守郭默侵漢河東至絳右司  
隸部民犇之者三萬餘人騎兵將軍劉勲追擊之殺萬  
餘人固默引歸太子粲帥將軍劉雅生等步騎十萬屯  
小平津固揚言曰要當生縛劉粲以贖天子粲表於  
聰曰子業若死民無所望則不為李矩趙固之用不攻

而自滅矣戊戌愍帝遇害於平陽桀遣雅生攻洛陽固  
奔陽城山

大興元年春三月癸丑愍帝凶問至建康王斬縗居廬  
百官請上尊號王不許紀瞻曰晉氏統絕於今二年陛  
下當承大業顧望宗室誰復與讓若光踐大位則神民  
有所憑依苟為逆天時違人事大勢一去不可復還今  
兩都燔蕩宗廟無主劉聰竊號於西北而陛下高讓  
於東南所謂揖讓而救火也王猶不許使殿中將軍韓

績徹去御座瞻叱之曰帝座上應列星敢動者斬王為  
之改容奉朝請周嵩上疏曰古之王者義全而後取讓  
成而後得是以享世長久重光萬載也今梓宮未返舊  
京未清義夫泣血士女遑遑宜開延嘉謀訓卒厲兵先  
雪社稷大耻副四海之心則神器將安適哉由是忤旨  
出為新安太守又坐怨望抵罪嵩顓之子也丙辰王即  
皇帝位百官皆陪列帝命王導升御牀共坐導固辭曰  
若太陽下同萬物蒼生何由仰照帝乃止大赦改元文

武增位二等



通鑑紀事本末卷十二下